

條

麓

堂

集

條麓堂集卷之一

賦

秋霖賦

夫何時序之迅徂兮忽首秋之代夏夷則肅以變律兮
商風淒于中夜雲祁祁而四興兮氣黹黹而沱漻雨霑
霑其不收兮曾不辨夫暮朝仰八表之同昏兮俯平路
而成濤日與星不能炫其耀兮宜條嶽之潛嶮百川溢
而赴河兮過龍門而壯哮空庭矯旒其薜剝兮震風厲
而驚條野獸悲鳴而無庇兮鳥噍噍而失巢羗百卉之
具腓兮胡沃浥之孔喬彼蘭蕭之芳臭兮汔同終于弱

質松栢沉沉而露泣兮獨青青而喪匹彼決明之瑣屑
兮沐餘沫而若喜荆杞茂叢於堂下兮笑曩時之桃李
斯螽唧唧于堦除兮鸛鳴埳其猶未止方霖霖而衍迤
兮忽滂沱而怒瀉豈溟渤之翻騰兮將銀河之驟下慨
余衷之多懷兮憎斯夜之修更數陸離而輾轉兮寒鷄
縮栗而無聲悄慘怛以鬱紆兮怨東方之未明空庭淅
瀝以淒清兮腸坎壈而不平聞皇天之惠物兮時陽任
而陰殆胡東風之浹辰兮寒冉冉猶未悔曰白藏臨於
正午兮恢台時其已改草木未老而先萎兮謂皇仁其
馬在爾乃悠悠載雲渰渰盈句井梧下葉庭竹繁聲蛩

臨淵而橫躍蟻循壁而上征感東山之戍客悲南陌之
征人貂裘葺兮既敝角兮液兮不鳴則有深閨佳人高
樓思婦悲蒲柳之夙零感蛩聲之在戶調砧杵兮寄遠
衣絨哀怨兮流黃素又有澤國逐臣長門棄妾悵洞庭
之增波撫團扇之明月望白日兮不見覲玄雲兮思結
紉蕙長顰握蘅水絕零雨灑而沾裳秋風拂而嗚咽伊
秋霖之可傷羗無憂而不竟天地鬱兮渾沌氛沴溺兮
相併思朱明兮何日惜玄髮兮青鏡嗟氣機之流易兮
固振古而若茲唯時至而變衰兮雖蕭瑟其奚辭物方
競于性情兮遘萎瘁其足悲諒階祀之不分兮云誰覩

夫天高而日晶謂收潦而水降兮顧蛙黾浮于前楹火
方流而金虎競兮恐大化之或傾昔洪水之湯湯兮文
命荒度而積成所貴于俟命以順時兮又何心于晦冥

工師求大木賦

粵惟宮室之肇建兮寔民生之攸安爰稽象于大壯兮
隆棟宇以為翰茲惟群美之所聚兮豈一丘之能殫夫
惟工匠之巧思兮持準繩而引度相垣墉之曼邈兮指
雲霓而布獲緬大廈之載經兮鮮材良之是懼披九域
而博觀兮索壯美之攸聚爾乃共工鳩功伯倕面勢公
輸辨方匠石考制伊樸楸之檀園兮雖秭億其奚數矧

櫟樗之朽碩兮固百尋而不顧歷歲月之遭延兮爰經
營乎修路于是北窮碣石南極衡峰東觀梁父西盡空
同上新甫而剪栢入徂徠而採松來梗柟于楚服貢榛
栗于秦封才胡良而弗選路胡遠而靡通至如杞梓椅
桐豫章楓枅扶桑貫日之標鄧固凌雲之莖擢修榦以
穎立綜玉理而呈紋莫不川運陸輸櫛比鱗陳罄山岳
之珍藏剖陰陽之蘊靈蓋誠慮夫輪奐之弗具美兮夫
何辭于相度之勞動爾乃衆材駢積百工輻輳引墨低
昂揮矩左右羗萬宇以星分颯千楹而雲構紛棗櫨其
猶餘任兮矧樽楔之難副諒得才之懋于集功兮在居

室而已然矧廣明之翼于休期兮奚三五之難肩故明
良之迓運兮靡夙夜而掄賢集衆思而廣忠兮俾疏附
而後先于以宏覆幬于群生兮峙崇庥于萬年配曰制
室繇木材則良兮建邦繇士賢則昌兮聖哲旁求恒遑
遑兮宅中流榮永無疆兮

頌

天保長生頌

臣聞與天體同其大者聖人之德也其基命者也與天
運同其久者聖人之壽也其眷命者也蓋天道不僭而
臨下也孔赫帝德罔愆而昭事也有常玄感之所潛通

神工之所默佑雖莫測其機緘之妙而有信如符節之
合者此我皇上一德承禎重玄錫祉萬萬載而無極也
且天無私也而其申錫之休必隆于至德天不言也而
其顯道之彰必徵諸事應故純佑之于始者可以豫乎
後也昭應之于古者可以驗乎今也昔青虹感而太昊
生因以拓繼天之統大電繞而黃軒誕因以衍迎長之
策哲命之降貽于初生歷年之永引于勿替巍然上壽
邈焉隆古矣寥寥百代迄于今日始于我皇上而再有
徵焉寧非斯世臣民所深慶而利見者哉仰惟天佑我
皇以為天地人神之主方歲丁卯之發祥也河清應于

寶運既以示其有開之先今歲庚申之首祚也元春會
于景命益以引其無疆之慶保佑之至在兆必萌申命
之休積久彌著故夫靈雪時雨甘露醴泉之降相望于
歲時瑞穀鮮芝白鹿玉兔之來接跡于苑囿在昔列辟
得一稱奇猶足以為壽命之符而況至和異應疊呈駢
列天眷昭然明命不爽則夫我皇上膺遐福撫洪圖豈
惟與羲軒比其歲年抑且與天地同其悠久皦皦而無
疑也昔周雅之祝文武也博喻于岡陵山阜日月松栢
以極單厚之頌而原本于天保廣成之諗黃帝也究極
于耳目形神陰陽內外以示處和之要而歸旨于長生

臣誠愚昧敢效斯義茲當萬壽聖節敬撰天保長生頌
以獻雖見聞術淺無如廣成之微而愛戴心誠庶幾周
人之蓋云爾頌曰皇矣上帝鑒茲有土普燾群生貞觀
振古顧求睿聖神人是主既濬厥祥載篤其祐在昔軒
昊應瑞生神握紀延禧明命聿申錫羨匪私克敬是親
于今為烈眷我皇仁其眷維何河清丁卯虹繞電流貞
符同授寶筭滋長瑤貺彌厚元慶同春茲歲之首曰維
我皇弘仁體道凝真泰始含幾玄造光叶三辰春陶四
隩有感必通無遠不到克配上帝祇承厥休莊敬日躋
明禋孔修百神受職多福聿求璿曆載衍靈命莫儔屆

此秋中興龍之旦瑞頴西成極暉南煥樞紐薦符蘿圖
苞蔓帝日光華卿雲炤爛時維皇德克荷天籙重譯獻
琛窮髮捧玉保世滋大唯日不足天子萬年永調玉燭
臣拜稽首祝我皇壽箕翼齊明乾坤媿久爰定神君以
襲氣母天子萬年受天之祜

萬壽宮頌

臣聞德覆萬寓者必隆丕固之基道合重玄者必啓維
新之運故湯敬日躋而命式九圍焉文心昭事而眷此
與宅焉其對越者有赫其降鑒者孔邇志氣交感之機
德福相成之應表表乎不可誣也我皇上心涵大始道

契元神建皇極以履中握真符以御世淳耀內朗而海
甸恬熙威稜外憺而氛祲蕩戢翼翼乎克敬之忱愈久
愈新煌煌乎受命之符益昌益熾者也茲者仰承上天
之仁愛茂績文祖之宏規式啓昌期爰恢壽域枚卜壬
戌之首祚鼎建西苑之新宇于是共工鳩族而群材競
集玄穹篤祐而休徵顯示崇規始營則靈雪培其基玉
礎辨方則神風助其定雲構啓始則恩滋毓其瑞棟隆
建吉則霽景呈其暉神陰隲以與能民子來而趨事是
當六陽之屆候不十旬而告厥成焉臣伏覩天居爽塏
帝座尊嚴千櫨赫奕而鳳翔萬拱峻嶒而鴻集列縣彤

之繡栢垂琳珉之文璫浮柱迢遙以星懸飛梁偃蹇而虹指流離爛熳璀璨輝煌巍巍乎度祖基以增崇配紫垣而共峻矣既而申垂帝命明示仙言賚祉新宮錫名萬壽廼我皇時乘六龍卜穀旦而臨御之于是怡性仙居躬綏繁祉熙辰茂對異瑞苻臻靈龜叶考卜之祥玉兔獻長生之兆並至如期兼呈不爽豈非昌時之嘉應永命之玄符者哉若夫臣子之義沐寵榮揚休美歌天保于周曆祝華封于堯年斯固就日之微忱祈天之大願也臣謹拜手稽首颺言而作頌曰赫赫我皇受天明命執契中興統乾作聖求福不回日嚴祗敬相維西籙

鼎新厥宮紹祖遺
芑荷天眷隆獻歲經始卜吉鳩工朱
明啓律元功遽奏匪直民力亦昭神佑吐納日月掀揭
宇宙金梁虹駕玉棟鰲擎螭蟠文礎鳳翥連甍美哉輪
奐勝比蓬瀛皇揆剛辰爰居爰處摹象辰垣嗣徽烈祖
茂迓玄禧精禋是舉緝熙純嘏保合太和總握真符年
所歷多軒筴維延周祿是荷申命重玄揭名萬壽駿業
光前燕謀貽後岡陵正永松柏儷茂靈龜獻瑞玉兔生
祥仙齡悠邈浩劫寧康小臣稽首頌聲載揚我皇壽考
萬歲無疆

瑞應王龜仙芝頌

我皇上一德承休三靈禋社太和酣鬯茂澤旁流三十
九年于茲矣醴泉甘露靈雪時雨之應相望于歲時瑞
麥嘉穀白鹿玉兔之珍充牣于苑沼皇天瑞貺亦云至
矣而眷命之申未已也茲者八月上吉虹流屆節爰有
玉龜二枚仙芝五本出于浙東天目之山獻祥闕下遠
邇臣民歡傳踴躍以為希世之奇耳目未覩臣謹按前
史龜筮傳瑞應圖等書龜于物稱神異焉其得年最久
生三百歲遊于蓮葉之上三千歲伏在著叢之下壽五
千歲謂之神龜壽一萬歲謂之靈龜是以太昊感地畫
之應黃帝受西王之符陶唐承科斗之曆夏禹錫洪範

之疇俱登上壽之年共躋列真之宇者矣然或赤文而
玄甲或青純而蒼光色匪純瑩來不雙見未有皦然玉
質同時耦至有如今日者也臣竊惟龜神物也于微為
壽白金色也於行為秋允符誕聖之期丕闡降年之永
矧天目者太微之洞天也神芝者元氣之精英也出自
天目兼著鑒下之赫焉伏于仙芝特呈類應之符焉不
言之示厥類惟彰無疆之休受命孔固則夫我皇上衍
遐福引昌筭豈特與昊軒比隆克禹媲美殆且萬萬年
與天地相為悠久而不息也昔元嘉有千畝之獲而編
之於史籍雍熙有蘇州之貢而侈之以歌曲隻瑞足稱

一時傾動如彼况連璧示異重以靈華焯矣無前之烈
顧不知所以揚厲者哉臣不勝惓惓恭撰蕪頌拜首稽
首獻諸宸極雖不足以美盛德之形容亦庶乎摠微衷
之祝願云爾其辭曰皇天顯命開期誕聖萬寓承熙百
靈錫慶景風調燭海波澄鏡翔泳由仁謳歌若性兩間
合德四隩同春協氣載暢嘉應荐臻既呈乾符亦效坤
珍超圖溢牒月異日新越有雙龜瑤光散彩雪態生寒
霜文曜皚聯光南極胚靈東海真宰護持千年有待煌
煌五芝越嶠有遐日精六英雲蓋九華予以劇之瑤函
是加玉龜出焉亦孔之嘉煒彼四靈伏此三秀藏神粵

區表竒昌候來遊皇沼亦植皇囿物應昭然天庥滋茂
卉異維芝龜玉稱竒睠茲二美共域同時永延聖壽福
祿綏之祇薦清廟祖考歆思是惟我皇昭事上帝聖敬
日躋明禋不貳受命溥將降福昌熾如日斯升如川方
至皇有懋德天貺竒祥式是百辟佑于萬方臣纂洪烈
頌聲載揚我皇壽考萬歲無疆

大有年頌

夫魯史重有年之書周雅詠惟魚之夢豈非以齊民所
天恒先粒食哲王上瑞厥在豐年也耶故夫慶雲甘露
醴泉噐車二氣之凝和爾紫芝赤鴈天馬神爵庶類之

葆珍爾猶皆被之管絃編之絃簡宣昭盛美後世有述
焉矧夫五官順軌百穀實好陰陽鮮愆伏之灾田穡遂
有秋之願茲盖中和位育天人信順之明徵與夫氣珍
物瑞不同日語矣黻藻闕休垂之無極當不啻昔人之
所稱述者臣緣斯義僭率陳頌雖枝窮繪日謝美前聞
而寶在安人則邁祥於往昔也其辭曰維皇建極與天
符德志切懷人政先惟食千畝供祠三椎導力維天降
康時雨時暘璿璣應節玉燭調光睠茲遐邇貽我菽粟
維民承休胥慶西疇京坻露積倉箱于收耕鑿帝力鼓
腹優游昔在后稷式是稼穡文纂仁基啓土建國旦叙

幽風無逸著則皇崇遺訓亭殿于鐫靈既既協景錄載
延保佑申錫自今萬年

瑞應白鹿頌

夫聖人體希夷之上德握闔闢之靈機參化育以無私
並乾坤而不毀則必有至和之珍育表自然之景符圖
牒具存不可誣也嘉靖三十九年建子之月有白鹿出
于陝西萬壽之宮乃有野人神誘其衷以報于衆守臣
從而敬致之廼當三朝獻歲之前貢諸闕下皇上祇惟
玄貺穆然以思若曰茲惟瑞獸衣此殊色以地以時申
命丕顯何敢不肅承嘉賚于是卿尹庶僚以暨都之人

士翕然色喜訢訢相告嗚呼天人相與之機志氣交感之妙茲不具有明徵哉蓋鹿純靈之異獸也白金方之正色也抱朴子謂鹿壽必千歲五百歲而色白述異記則又謂千歲色蒼千五百歲而色始白者厥惟長年之異質而列真之靈御也昔軒轅詮至道之精執清靜之要于是王母之使乘白鹿而獻環焉是仙蹟之隆也玄元蘊三炁之精抱得一之本迺乘玉女之化託白鹿而凝神焉是玄教之宗也我皇上靜觀元始默運道樞其精不搖以襲氣母綜軒轅氏之百昌谷神永存以象帝先會玄元氏之衆妙致此神物來自西方西方者神明

之奧區也故金母之居厥惟玄圃青牛之駕亦適流沙
迺茲上瑞所出適在其陬是黃帝玄元之寶錄靈符越
千萬年而復集于我皇也鑠乎盛哉且時正一陽見天
根之來復也宮為萬壽示引年之勿替也自皇上纂大
凝圖天地動植之瑞光于徃牒矣而唯此珍獸間歲屢
出一獻于晉藩再獻于江左而茲復自神臯獻焉則夫
我皇上滌玄覽遊汗漫久視域中永為天地神人之主
者當與日月齊其光耀也斯世斯民同所慶賴而况臣
依侍耿光躬覩休烈其欣幸歡戴之情固有倍萬于衆
者是用不揣庸陋而獻頌焉其辭曰瑤光降精于彼靈

域有鹿甦甦如玉其色千年變彩金行秉德璇池載飲
瓊芝攸食靡群靡友以騰以倚萬壽之宮有來至止一
陽之月爰呈其美物豈無知天命則邇仙瑞既彰野人
爰報自我西郊來從東道文囿曉辭虞庭春造麗質欺
霜鮮文奪縞帝居闔闔沕穆天通嘉應游儀睿載融
育物對時凝命在躬三陽伊始百祿來同恭惟我皇含
精抱一天牖其聰神降之吉啓奧銀函窺真石室大道
為徒列仙是匹爰致休符增光邃古黃帝膺籙白環薦
祐玄元託乘蔚為道祖億載揚暉我皇與伍皇在齋宮
鹿馴于庭皇在法苑鹿遊于林皓鶴比舞玉兔共音蓬

萊匪遠碧海寧深寶雉興祠白麟作歌矧此奇珍集禧
更多頌聲載啓耿蹟不磨萬年仙筭與天同科

王眷長生萬慶頌

我皇上膺昊天之顯命躬上聖之靈姿握衆妙之玄機
纂寢昌之丕祚協氣熙仁歷年彌茂嘉禎昭貺與日維
新迨茲歲在辛酉寔降神駐世之五十五年而執契御
時之四十載也萬姓謳歌永祝帝社百神受職幽贊皇
釐天人悅豫志氣流通爰垂希有之符以介無疆之壽
廼當八月上旬而日躔丁卯焉夫八月上旬者我皇萬
壽之聖節也丁卯者我皇景命之元辰也以萬壽聖節

而景命之元辰蒞之昊眷所垂厥猶告詔若以我皇體
睿含幾邁跡三五栖神緯氣得美萬億既膺必至之期
宜示有開之兆故于誕靈之日而臨以正元之辰以見
保世滋大當道洽化成之餘啓佑維新即哲命肇貽之
始也嗚呼天之孚佑我皇一至于此豈非萬世無疆之
慶也哉臣謹稽圖牒博徵禎瑞凡天象地符氣珍物異
自我皇御曆以來層見疊呈歲月相望者已皆足以明
壽考之徵申錫之寵矣而不若此慶之隆尤為特異良
以七政之經緯不齊而朏朏異焉六甲之馴行有次而
分布均焉造化有所不能違巧曆有所不能計者爾乃

明命昭垂神機妙合蓋自庚申元春之旦而景度臨之
既表元慶之方興及今辛酉萬壽之節而景度復臨之
益引萬慶于勿替比歲之間竒徵再見自昔聖帝哲王
承天撫運固莫不有定保之徵矣未有顯受嘉符靈承
寶貺若此之明著者然則我皇長生久視比照三光億
萬載而無極信可知矣臣依藉榮光浸濡茂澤受施無
量亦既有年曾莫能少贊鴻圖仰酬玄造唯有祈天祝
壽廼其夙夜切切思効之微忱也遇茲異慶歡忭無任
是敢輒陳蕪頌一篇仰纂玄賚雖萬壽之衍無俟于形
容而三祝之私不能以自已焉爾其辭曰明受天命奄

保萬方三靈禔佑八葉重光璇源濬發寶籙凝長赫啓
中興篤生聖皇篤生伊何歲惟丁卯青液東榮朱輝南
皞坤貺河清乾施電繞元命巍巍禎符表表厥期伊何
秋中上吉金天司候星虛殷日壽曜會躔南呂應律揆
惟初度降此陰隲帝德廣運昊春恒新凝圖載永降命
益振屬茲聖節妙會元辰壽囿八荒筴迓千春曆象統
天星躔有紀甲子循環既週必始毓聖熙辰正元屆止
帝美無疆天命孔邇氣有胚休物有含秀顯惟代珍亦
昭神佑未有禎祥合符辰宿考牒稱希稽徵惟壽是惟
我皇歲與天同浩劫不老冲貌常童山峙維南日升在

東有先必兆無感弗通休茲萬慶在昔未覩日月宣明
華夷忭舞小臣作頌拜揚天祐於萬斯年皇作民主

恭讀敬一亭中御製碑文頌

夫宓犧陳畫而陰陽之秘彰堯舜授曆而精一之要啓
帝皇之遐軌也斯道其權輿矣乎夫心道之筦也視聽
言動心之發也施之于百為運之于政治心之推著也
故帝王授受要在傳心是義也宋儒繹之悉矣匪敬則
心弛非一則心雜千聖有作靡能易此我皇上淵聰沉
密洞見道體出其獨得形之製述曰敬一箴則發聖心
之真知曰四箴注曰心箴鮮則據前賢之未盡微辭與

義真與堯舜宓犧萬古同符猗與盛矣布在學宮鐫之
豐碑壽考作人之休匪曰海隅是光將必永諸世世小
臣莊誦佩服不勝踴躍謹拜手稽首而獻頌曰肅肅辟
靡有亭翼翼崇崇貞珉絲綸是勒其勒維何敬一有箴
四勿慎動百體從心穆穆睿旨蔚蔚天章星陳極拱鳳
翥鸞翔廓彼玄樞昭我彝訓天地苞真群生立命玉言
孔大王心孔一薄海承風百神咸秩小臣拜首天子聖
神萬年道統載此刻文

大椿頌

大椿頌者為年伯丈一愚葉翁六旬初度祝也翁降溥

自天守貞在己匯江淮之靈浸承闕閱之世澤幼襲華
腴鮮紈袴之習長淪芳潤衍詩禮之傳是用肯茲前室
貽芑後謀天彝秩于家庭月旦推于鄉黨而復降心濟
物抗志離俗機事都忘白鷗結社矜人咸賴黃雀銜恩
是以陰德隲于天心顯慶膺乎人瑞今茲敦牂在歲甲
子初週尺統重問肇紀春秋之始太音方遍更生聲氣
之元遁揆初度之辰寔在中元之月于時秋也梧風薦
爽桂月澄暉南老獻祥燦黃符于元命東王授籙育青
氣于陽和爾其棟宇雲飛簪纓星列園黃耆德爭陳松
栢之章王謝高門共致葭莩之慶仙人羽客幼子童孫

日月壺中獻九霞之醴雲仍膝下舞五彩之衣萃彼秋
筵傾茲春酒禮文秩秩福祉穰穰業授常金嗣奮秋風
之鷗鶚系延謝寶仍叶夜夢于熊羆奕奕乎煌煌乎誠
積善之明徵而生人之至樂也越有元胤式纘休烈克
揚庭訓鬱為國華鳳凰棲畔擅蘭署之風流鸛雀樓邊
敷棠陰之惠澤試蕭三輔借寇一年雖驅馳四牡不懈
王程而睇眄三吳有懷家慶白雲千里遵東海以興思
黃髮萬年指南山而獻壽耿耿乎孝慕忠忱事君資父
者也維附驥南宮登龍北海顧此薰葭敢自忻于倚玉
願言苑李曾莫報于投瓊緬觀愛日之誠思致引年之

祝蓋龍虎榜內既叨四海之弟兄橋梓行中即是一家
之父子愛莫能助情見乎辭取則麥丘敬陳芹曝師言
莊圃式頌椿年不辭雉窟之繆用侑鶴飛之曲云爾頌
曰二氣胚渾五緯散精委和含順神物攸生長江之南
牽牛之野偉有大椿苞靈于下竒根蜿蜒頰浸重泉修
柯第鬱上摩蒼天廟以剛風沐以文露至精滋熙淳液
內固黛色猗那銅骨鬼壘終古青青柯葉靡改朝遊驚
鷺夕宿鵬鵬鄧林西拱若木東承歷載八千春秋始允
軒紀滌今未盈一歲海波可畝桑土可濤獨抱元陽後
天不凋子幹孫枝貫口擎雲明堂之棟清廟之枌楚南

有楔玄圃有桃以彼綿延方茲暮朝於乎造物信矣多
奇挺擢靈壽疇物克夷樂只君子維德之基億年壽考
春秋若斯

五言古詩

憫農詩 館選首卷

北陸曜炎曦南畝事耘耔荷笠鋤午禾鋤濕汗成水金
風肅霜節田家初罷耒私逋償舍翁公租歸官理日暮
空柴廬無能飽糠粃宸襟軫軫稼穡幽風構崇址虞絃協
遺歌省助多方喜所希玉燭調擊壤詠千祀

秋感 三首

蓐收御六極涼颶萬里至蕭蕭一夜聲減此千林翠大
化運玄機寒暑紛相易百年諒非遠隙影騁六騎念茲
惜芳時勲業愴心事

駉駉遭孫陽輝動鹽軌下亦有登李客龍門重聲價我
師蒞西服振鐸興文化葑菲幸品題執經侍春夏秋風
迫離期春念心如謝山高流水深邈矣青驄駕

秋夜一何長秋思一何苦思苦不欲眠夜長不欲曙桐
影暗窓月蛩聲襍四字對此淒清時壯懷紛若縷悠悠
撩我心的的不堪數推枕起夷猶披衣聽晨鼓

感寓 三首

楚楚蜉蝣羽朝霞爭鮮光螳螂遊車轍奮臂恣徜徉綠
衿隴山鳥能言巧如簧大鵬鼓羊角鷹隼鷙秋霜巨細
形則殊矜性均可傷所以丹穴禽耻隨群羽翔遙舉千
仞顛孤鳴向朝陽

荆壁蘊散石舉世迷其真哀哉獻玉人泣血獨傷神炯
炯豐城獄雙龍埋其精寧知重淵底紫氣燭星辰聖賢
葆靈耀和光以同塵子與詆淳于仲尼輕四隣

西風中夜起羅帷生驟寒惻惻不能寐攬衣起長嘆出
戶步前楹星斗何爛斑促織鳴草間露下白團團感物
有良悲安能惜朱顏

暮春郊行二首

晨風飄我袂，命駕遵廣陸。高塚何纍纍，遠近緣山谷。遺
碣委豐草，埋沒不可讀。長安昔豪盛，股肱雄近服。層甍
麗丹雘，飛幟交華轂。衛霍矜功伐，金張誇世族。意氣軼
雲霞，輝光借僮僕。寧知百歲下，松柏摧樵牧。壟址半為
田，寒食無人哭。首陽有雙塚，鬱鬱屯喬木。過客肅清風，
野老薦時藪。至道貴朝聞，榮利安足逐。

驅馬出東郊，高原聊騁望。山川信鬱盤，風物何駘蕩。關
門南控雄，河勢北來壯。草際漏朝暾，雲間出層嶂。桃林
紅漸歇，麥隴綠方漲。將因寓物游，暫識青春狀。一氣播

塊礫萬類欣條暢上宰寂無言陶冶歸哲匠

四懷詩

有序

歲己未余與二三同好繹集文雅諸君子者皆
深造閎觀珪璋競爽惡茲短翮逐下風於枋榆
間為幸鉅焉比庚申之春李子廷良扶侍還劔
江其夏孫子文和繼以制歸越陳子德言迨秋
陟留都少司成而南焉子體乾復以奉使冬出
廖廖文社唯餘余與吳子子言而已以居止之
不隣且不獲朝夕繼見時物遷代忽焉又春念
良友之我遐惜盛時之易邁惓然興感輒成短

述併以示子言俾同賦焉時辛酉三月也

華嶽何穹崇三峯柱清昊闕河遙拱侍乾坤信靈造深
潭遊蚪龍絕境茁瑤草之子廬其陰雲霞共昏早喬躋
盪雷雨遙睇入瀛島嗟君生人秀氣稟金天灝奇葩曜
人文靈根蘊國寶蘭闥叶心晤瓊編恣幽討歡言方在
茲悲緒縈離抱物態妍芳月山川限同好春雲隱仙掌
目極天浩浩寄言新豐車何日邯鄲道

右馬體乾

曰余秉微尚汗漫耽群籍石室事追尋名山恣探歷坐
觀多岐分翻使群疑積有美豐城彥高達奮逸翮精義

析毫芒玄談貫今昔秋月何清瑩春水渙然釋握手未
終竟忽漫成離索相望楚天青相思燕草碧結交論意
氣遠近豈形迹心鑑苟不異萬里猶咫尺與君夙昔願
炯炯良匪石偉彼蘭蕭化因憐芳歲擲

右李廷良

東風吹太液春色滿燕京宮柳媚綠姿庭花敷朱榮遲
遲淑景長萋萋芳草生覩物有良感懷人百慮盈疇昔
同君子入室接心盟妙合語默契周覽風雅情冲氣四
時備夷襟千頃清依歸誓畢志孤權復南征嘉月宛如
昨美人隔江蘅寤寐見顏色躊躇步檐楹曲終孰與悟

有酒聊自傾三復伐木詩感此嚶鳴聲

右陳德言

丹穴毓鸞鷟藍田種璆瑒鬱彼寰中傑世德發清嚮鯨
翻渤澥深鵬運天池廣妙悟每通神雄談時抵掌在衆
誠不羈授分茲可仰惜陰啓篇翰開軒對幽敞昕夕共
討論車馬隔塵壤蓬質洵有托學海恆心賞游衍方及
晨越水牽別愴譬彼申路岐宵行瞽無杖駘蕩逢韶節
蒼茫寄遐想山陰興可乘願理扁舟訪

右孫文和

古意題便面

嶧陽抱霜骨，斫取最高枝。微以九真珥，絃以野蘭絲。逸
人弄清調，寄志栗陸時。泠泠山水間，高深愜幽期。時有
鍾子期，聽曲識其微。斯人悵已矣，孤衷當告誰。豈無廣
陵譜，所嗟心賞違。呼童韜錦囊，行採北山薇。猿啼清晝
閒，日暮秋鶴飛。徘徊向空翠，山木含餘暉。

十四夜對月泛湖二首

空谷時多暇，佳候秋正中。駕言縱一葦，遡流牽長風。嵐
翠暖已暝，月出瑤臺東。灝氣天漭蕩，金光波玲瓏。高樹
颯驚鳥，夾堤宛卧虹。濁醪飲不極，孤棹信所通。白露湛
珠華的皪，明芳叢皓魄。淨如洗皎焉，萬象空披拂。衫袖

寒清冷俗慮融夙東方外契久羈塵中蹤及茲愜幽賞
復爾觸遯衷結交鷗夷子問道河上公將因秋水興東
去採鴻濛

進艇夜方半纖御流寒素微茫數兔毫婆娑影芳樹瑟
瑟菽葦風晶晶蕙葭露鳬鷺眠不驚蟋蟀聲猶訴桴棹
淺瀨過揚櫂中流驚天水浩不分玻璃萬頃注河漢俯
若垂舟楫遙疑赴欲訪支機石試問乘槎路湖南五老
峰時有九仙駐月在水中央靈境浸深渡忽逢孤鶴飛
恍與列真遇鄉園信多美夢遊昔已屢今夕果何夕暢
此滄洲趣

鴛漿泉詩有序

余覽山海水經諸編所述中經山有鴛漿者謂其水居山頂渟滙不流冬夏常滿驟用之不加損也亦不以水旱盈涸心異之壬申歲返故山徧訪土人不獲疑所指湖陰雲舉之峰似今之草坪山者甲戌八月既望泛湖之次日遂杖竹徃尋之垂蘿懸壁捫磴直上與登天不異既陟其巔則玄泉注焉萃明境象超映訊之道人其言與二經所述迥合余甚喜之乃為詩以紀其勝俄奉召北上越五年始以稿寄弟象鏡之泉

上石俾來者有攷焉

中經富名山蜿蜒帶河滙造化剖幽藏丘索標靈致特
峰竦湖陰高指觚觿次南望揖嶽蓮連岑近相避絕頂
有神泉泱潏含元氣澄泓滿不溢燠漉邈不異雲漢凝
清暉瀼露奪甘味厥惟帝臺珍鶯漿自昔誌頃余釋塵
鞅鄉山恣容裔尋此竒勝蹤疑為鬼神秘秋波浸空碧
曉月弄山翠躋攀日無休吟賞夜不寐拄杖龍所化恰
與仙源值膏濡草木蕃氣蒸川原媚恍覩九仙境快我
千古意振衣天宇闊鳴絃水脉沸迴眺飛仙洞巖壑下
無地信宿澹忘歸蒼茫結幽契王池授丹訣潮音聞未

誠靈液欣可托永言滌心累

七言古詩

中秋無月志感 二首

憶昔中秋月滿城兒女喧佳節兔魄清冷桂樹寒蟾光
澄淨秋毫徹閨中拜月競風流帝子絃歌夜上樓斜度
玉繩更漏歇尚留殘照奏箏篴忽然夜半陵谷改碧殿
朱門復誰在月到空城亦解愁故教雲霧迷光彩黯黯
千山夜氣深秋聲作陣戰前林鵲飛不見南枝影蚩冷
時聞北戶吟空堂對燭聽寒雨往事關心心獨苦天上
陰晴竟偶然人間時節生今古

明月四時色獨與中秋宜人生隔歲眇此夜云是玉宇
清暉期狂雲何處來擾擾漫天維黻黼布濃曠浸靈散
雨絲南樓老子興復淺西園才人愁賦詩吾聞山澤氣
鬱為氛霾滋黃道臨閭闔清光應不虧安得振長翰高
舉凌蒼霓左秉招搖矛右麾九星旗掃蕩八表陰沴伏
灝氣露出天地姿廣寒宮闕千門爽望舒按節巡天逵
露凝百卉綴珠華四溟五嶽爭新奇吁嗟壯觀知何日
坐令大地還昭熙却愁雲淨晨鍾發孤負清光全勝時
送憲使嶠陽張公兵備遼陽歌

十年結綬長安陌樽酒青燈共朝夕千里驅車遼水頭

塞雲關樹遠悠悠他鄉送客正愁絕風雨滿城天又秋
城隅咫尺遼陽路書劒翩翩從此度笳吹宵吟白馬河
旌旃曉拂盧龍戍盧龍東去山峩峩白馬河邊雜虜多
烏桓保塞仍侵暴韎韐鳴弓更請和居人刈黍秋乘障
關吏看烽夜枕戈屬國歲時妨帝貢鎮城絲管解夷歌
由來大漢無中策今日烟塵在東北廟謨歸重尚書郎
天子臨軒賜顏色多冠結駟出神京蕃漢貔貅擁道迎
前旆未臨木葉塞威聲先震漠南營轉漕既貯金城粟
繕堠還尋秦代城貂裘帶雪寒猶薄玉帳屯雲夜不驚
君侯原負孫吳畧樽俎折衝亦不惡黠虜應傳破膽謠

健兒始信從軍樂長歌送君日已曛贈君寶劒青蛇文
丈夫原有桑蓬事看取策勲拜聖君

仙山採芝歌為守極翁賦

洞天雨過千巖綠流雲占斷春山足
龐眉何處採芝翁遙訪金英到幽谷
雙松手植不知歲携鍾謁來松下憇
長嘯疑聞鸞鶴音攬衣似帶烟霞氣
問翁何事採芝頻親見桑君受訣新
能將一勺上池水散作萬家都市春
烹芝瀹鼎應無數宅畔杏花栽萬樹
雲笈標功徧世間山中芝蕊春如故

南谷草堂吟

君不見高連山下泉如玉終篁萬頃緣山是南國佳人
冰玉姿開堂占斷溪山曲研硃點易閉重林枕上仍窺
太昊心秋原引杖防龍化夜月裁簫學鳳吟虛簷環佩
風前急踈牖琅玕雨後陰清冷不辨四時色唯覺春來
換鳥音十年構就長楊賦六羽聯翩度天路玉署聲華
映縉紳草堂風月閑朝暮恩遇寧忘國士期賞心時寓
騷人句燕臺越嶠鬱參差萬里雲烟寄夢思獨有梅花
如故國春來三嗅向南枝

歷原圖歌

郊原膺膺分烟樹云是重華躬稼處象鳥迹沉野老傳

龍蛇碑斷蒼苔護千家絃誦瞰虞城望中河華相逢迎
山巖尚存太古色春風出谷幽禽鳴美人好古兼愛奇
短筇尋勝不知疲結廬種竹占清絕宵吟二典聲吾伊
一朝振袂遊京國坐使聲華冠南北蕙帳不褰夜鶴驚
四時風月常相憶幽懷漫寄丹青乎水墨微茫分戶牖
千章喬木擁簷除萬疊青山在屋後中堂突兀出雲寰
對之不覺開心顏荆籬添几宛相向此身若在條涑間
我亦十年去故鄉西風鄉思正茫茫何時同對歷山月
樽酒論文舊草堂

四景圖詩

谷口新鶯初弄舌
條風融盡千崑雪
流水脉脉溢洪陂
滄波萬頃含清澈
漁舠搖曳縠紋長
晴沙兩兩浴鴛鴦
梵宮微茫帶遠岸
時有鍾聲出綠楊

綠槐葉密滿地陰
石欄曲抱澄潭深
南山雷雨靜宿翳
眼前突兀開危岑
峰巒變幻生竒趣
虎躍蛟騰幾奔赴
石橋轉眄天宇空
望裏故山自朝暮

秋江浩蕩天無極
萬山雲淨青如拭
纖阿寂寂冰輪寒
大千世界玻璃色
道人逸興欲凌風
瑤觥浮白玕珠紅
留連終夜不知倦
酣歌聲徹蛟龍宮

上天同雲迷四野
遠山一帶瓊瑤灑
萬千紅紫失顏色

惟有孤松占幽雅抱琴沽酒訪情親驢背寒吟得句新
分付奚童莫浪語深臯鶴夢入清旻

十五夜對月泛湖

暮雲歛盡天如拭澄湖萬頃涵空色乘興還登殿父舟
訪奇直傍蛟人國喧闐簫鼓急如流越調吳歛相倡酬
星河耿耿魚龍夜霜露淒淒菡萏秋湏臾擎出峰頭月
霏霏滿地清暉發桂液依稀沁銀海兔魄真成鑒絲髮
此時碧波平于掌十二輕舠遞來往飛觥交午賓客歡
有酒如澠藉雙漿王孫綵毫攄幽思衲子法音送清響
采石酹月披錦袍千古風流寄遐想參橫斗轉雲漢移

酒酣氣健不知疲貝宮寂靜瑤華溢海若起舞馮夷隨
素娥手授玉杵藥咀嚼沆瀣甘如飴輕風徐來襲兩腋
便擬輕舉翔天逵君不見武昌月色南樓好胡床笑傲
稱庾老一時僚佐儼如雲今日清光照秋草世事陰晴
不可尋等閑圓缺成古今但願年年三五夜扁舟新釀
對知音

四景圖詩應制

韶陽入律淑氣多平湖冰泮含碧波山容遠近翠屏膩
風柔好鳥相婆娑千紅萬紫花如茜麗日晴雲滿芳甸
尺綃披拂春臺開熙熙如見東皇面

青葱忽覩千章木，頓令永晝失炎燠。蓮陂新漲波溶溶，
梅雨初晴山矗矗。菰蒲灣頭水鳥嬉，林中似聽嘯黃鸝。
曠有清陰均四海，信是南風薰且時。

井梧露重新飄葉，千江水與天光接。蒹葭霜信鴈將歸，
籬落秋容菊正燁。烟抹川原百卉腓，林端鷹隼擬翻飛。
澄潭潦盡商飈厲，王政迎寒應授衣。

玄雲四布天地冥，千山瑞雪朝夜零。寒衝林表鳥飛急，
潤入松臯鶴夢醒。茅簷竹逕清如許，幽芳先發梅根渚。
由來三白兆豐年，會見倉箱富禾黍。

應制題玄兔圖

爰爰玄兔何奇特雙瞳點漆毛潑墨驗瑞嘗聞格遠人
標靈曾擾堦墀側生綃貌出若有神餐芝眠草意態馴
獻琛已見皇威暢寶繪仍留宸鑒新

恭題畫鷹

蕪葭露冷金天碧晨風應候獵原澤驚鳥毛羽落紛紜
草間狐兔深無跡颺騰電發勢絕倫尺綃凝睇若有神
皇情非事從禽樂為憶鷹揚淨塞塵

條麓堂集卷之二

五言律詩

寓晉省彌陀寺宿

一劍天涯客孤燈寄上方
夢回鄉驟遠思發漏偏長
榻影留寒月鍾聲帶曉霜
無端清境曙風墮梵天香

漁父二首

霜重鴈初飛秋江浸翠微
纜邊疎葦合檣外遠山圍
漫任儵魚樂全忘鷗鳥機
垂綸不設餌日暮放舸歸
遺跡浮沉外滄浪歲序長
夢餘看碧嶂醉後倒銀觥
鴈影孤舟月蘆花兩岸霜
信知秋水樂蕭洒憶蒙莊

正峰精舍成招環江及子同修業馬詩以識始二首
窈窕鄴侯居青緗富簡書何因隨二妙同此惜三餘窓
雨芸香潤堦風蘭韻初雌黃千古意莫放寸陰踈
深院東風裏招邀意若何忘懷金可斷投分玉仍磨講
罷看魚泳吟成共鳥歌花飛春不盡庭沼發新荷

詠盆魚

金甲盆中鯉浮游玉戶陰一泓堪自託九戩不相侵每
有風雷日能忘江海心莫言天路遠在藻是恩深

積雨三首

徂暑維深夏淹旬雨不開萬峰朝隱日千壑夜奔雷南

陌征人怨東山思婦哀鬱蒸那可度極備信為灾
柴門深巷閉空館遍青蕪泛蟻憑堦竹濕蟬噪井梧掀
窓翻午卷懸釜理朝厨暑雨何為者長安病腐儒
陰曠連朝是朱明物候非地將陸作海垣用薛為衣虛
牖琴書暗空林烟火稀鴻濛何日判黃道見烏飛

贈鄉人近堤劉先生

白髮河汾叟湘潭遠卜居歲時同楚俗衣服自秦餘授
轄留賓酒開軒課子書江陵種橘處鷗鳥狎相於

題戴錦衣講堂侍直卷

將軍六郡豪世業襲龍韜博望新開講千牛近佩刀宵

嚴銅漏靜日衛羽旌高恩寵春宮裏時時奉袞袍

河中乙卯變後九日和坡翁韻

四首

登臨還九日勝跡驀成空物候何嘗異人烟迥不同
孤城秋草外斷壁夕陽中野哭千家血山山楓樹紅

右登高

憶昔黃花節天涯念母深故園頻極目今日轉傷心
踈萼寧相妬愁人自不禁因驚霜露改哀怨慈烏吟

右看菊

地僻軒裳隔沙平鷗鷺眠相過還偶爾一榻正蕭然
晴日依松菊秋風弄簡編物華感夙昔涕淚滿山川

右秋日右山過北園暫憇

承帝新開兆懷親舊舞衣重泉恩已渥風木願仍違文
鼎高難並祥禽擾不飛孤卿忠孝蹟河嶽有光輝

右秋日先塋

東原贈別對川舅氏

四首

麥隴正鳴雉長亭又別離殷勤京洛道悽切渭陽思最
是魂消地那堪春盡時臨岐何所贈襟袖淚痕滋
井邑摧殘後交親離別中停輿復此地把袂幾人同古
道柳仍綠山亭花自紅漸看征旆遠立馬對千峰
吾舅今詞客冲懷寄大庭苦吟頭劇白高視眼全青命

駕輕千里揮毫走百靈恒山從此去應為賦鯤溟
伏劍汾河曲傳經潞水前宮牆爛桃李道路足雲烟墳
典追劉向風流邁鄭虔菁莪淳化浹小邑擅多賢

舅氏約遊棲巖寺避暑詩以促之 二首

溽暑煩塵宇祗園想勝遊倦生程曉客興發子猷舟瀑
布湍如雪叢林氣似秋雲嵐紛在目神往若為留

古洞依層嶂深門蔭薦蘿鍾聲傳澗谷香氣控簷阿登
覽諸天徧瞻依六載多願言陪杖屨重與叩禪和

題便面漁翁

天氣入秋陰蕭蕭疎葦深一竿堪寄跡萬事不關心自

得水中趣聊為澤畔吟却防漢使者驚起富春禽

晚憇王氏園亭 二首

谷口林亭好經時更此過山川秋意近風雨夜涼多
曲沼翻荷芰空堦蔓薜蘿昔遊物候改高枕詠幽歌
何處堪投宿東山暫避紛壑聲爭夜雨峰影亂朝雲
夢入金華境閑披玉洞文列仙應笑我猿鶴久離群

蒙同年諸兄招飲馮氏園亭 二首

深院依芳樹凌晨匹馬來清幽三徑入瀟灑一樽開地
是蟠龍窟人稱吐鳳才論文堪竟夕歸路任遲回
綺席開暇日瑤林荷勝招閣虛天半落亭迥暑全消自

是交情密能令酒量高飛觥爭暮景逸興入清霄

孫侍御別業 二首

有美西臺伯開軒南澗隅
路人仍避馬亭柏欲棲鳥
望斗登山閣籌邊閱地圖
先憂廊廟志高興寄江湖
為訪幽棲客看山上竹樓
天光窺牖曙雨氣入簷秋
王塵談何劇金樽興未休
林冥歸路寂投轄若為留

嶠函道中 二首

西日嶠川阻北風旅思頻
夕林烟欲暝霹磴雪仍深
白壁終投楚鳥裘豈滯秦
遲回鄉國意不是倦遊人
不涉長安道馬知行路難
三門扼地軸九折入雲端
冰

渡那彈楫霜征但抱鞍垂堂寧可冒風舉羨鵬翰
將至新樂舅氏以詩來迓用韻荅之

宦轍來燕市相逢共越吟感時頻擊筑憶舊欲沾襟
引傳書犬庭留衙鷗禽圍爐談不厭一夕故園心

送劉晦亭之任夏邑

墨綬拜恩初專城故宋墟蒲鞭留古道竹馬引前車
水春明野芒山晴照閭索陰滿百里天子有徵書

贈吳之山歸金陵二首

佳句滿滄洲新知已白頭未成十日飲更作五湖遊
逸思江東鱸閑情海上鷗越吟留不得行矣悵仙舟

四月江南道孤帆任所之岸花供作賦檣燕伴吟詩春
草幾年夢暮雲千里思鷺洲應憶我芳杜月明時

送洪龍江駕部之任南都 二首

才子稱為郎輜軒滿道光桂闈初擢秀蘭署早分香雲
引清笳遠風生繡幃涼兩京非遠別不用怨離觴
帝里依南斗仙曹敞縉雲時清公府暇天遠大江分豹
畧研深策麟臺拜舊勲定知桑土議惟幄莫如君

送王鑑泉之崇德簿任

君去霅川郡江山似昔時陟看棠樹茂應動蓼莪思駒
騁還千里驚棲暫一枝不須重問俗政範在光祠

馬乾菴魏確菴二兄雨中夜集分得言字二首

茲夕共清尊心期不負言交親今雨密道術古風存燭
影分群籍鐘聲息衆喧多慚長者轍深夜在蓬門
坐久微涼入中庭風雨繁蘭堦通暗馥苔壁露新痕興
劇還添酌形忘欲放言清狂君不厭長日過高軒

王蒼谷挽詩

試把遺文讀終編倍黯然孤標高莫並佳句遠堪傳禹
會分藩地堯咨抗疏年藏舟何太遽不及濟通川

送鮑醫士

秋水浩無際孤帆千里歸露溥尊正美霜冷橘初肥囊

有光明藥心忘去住機春風幸相待莫戀故山薇

春日正峰招同館諸君同飲鄭將軍宅時正峰有
弄璋之慶諸君共賀之云 二首

甲第帝城南春遊並曉驂嵐光晴後出草色雨中含綺
席歌常滿金尊酒向酣清狂湯餅客更擬賦宜男

為有紱麟瑞同人此日歡春堦明玉樹晴室馥金蘭樽
俎情方洽鶯花節未闌夕陽犬尺五啼鳥促歸鞍

文丞相祠

千載成仁地松杉古廟寒淚流燕父老像設宋衣冠鍊
石天難補揮戈日已殘英魂招不得遺恨抱臨安

初夏憶山房 三首

何事東山客承明侍禁廬
瑣窓晴視草芸館夜讐書
浪迹經時久初心與世疎
素衣塵不化慷慨欲焚魚
舊業偏宜夏青山帶草堂
槐軒留日永麥野遍風涼
鹿伴朝遊遠鶯啼午夢長
金門千萬里歲歲憶滄浪
丹鉛長日事虛室理陳編
白馬談何易赤泉道更玄
豹窺迷弱管鯨運破洪川
耿耿操微尚青雲愧故年

秋日文社新集即事 二首

再訂芝蘭社夙懷慰所欽
江天三載別文史十年心
借直觀蓬質遷喬聽鳥音
青編秋氣爽重與惜分陰

弱歲耽群籍心同作者期賦矜班固麗字辨子雲奇鯨
海神猶壯蚤山力轉疲著鞭良不早一簣及今施

中秋對月

皎皎中秋月三年此地看兔毫應可數桂影倍生寒青
眼人情別黃花故逕殘有懷霄漢上把酒倚庭欄

贈劉醫士

海上虬髯侶青囊寄興賒玉爐烹石髓丹竈養靈砂繞
舍深栽杏當春爛著花百年城市隱原是董仙家

乙丑夏至

長日睡不足寧知節暗遷荷風輕掠燕槐雨驟驚蟬薄

宦逐青綬閑情寄素絃夜來湘簟爽忽地夢釣天

送鮑醫士歸歙

客舍更裁杏年來已作林每逢歸鴈至輒動越鄉心採
藥鄣山遠挂帆江水深小窓它夜月相憶說金鍼

送中峰楊明府之任戍安

二首

分符初試吏曳綬已爲郎驛路行携鶴公庭更樹棠土
風餘舊趙城郭帶清漳羨爾政成日鳴琴不下堂
五雲春獻賦百里早承恩人擬河陽美封連內史尊車
塵官道少鳥語訟庭繁會見雙鳬舄翩翩入禁垣

冬夜同孫正峰宴廼兄錦衣劍峰宅

二首

城隅斗酒會還過世臣家寒坐圖爐密宵談燒燭賒繡
書籤插架作賦筆生花終宴不知曙門前雪滿車

君家兄弟好長日共論文經有專門學業成報國勲賡
詩時不厭說劍夜將分折簡勞相召清言此夕聞

挽郭生

燕領通侯相龍韜上將機青春應有待玄夜忽長歸壯
業遺弓在精魂化劍飛最憐朔塞月一夕照靈衣

遊西山

十首

見說西山好迎秋許暫尋城隅百里目馬上十年心出
郭緇塵隔過橋幽趣深梧風何處至邂逅一披襟

是日秋

西湖信多美十里發荷花清馥疑含露嬌芳曼映霞魚
龍樂秋水鷗鷺睡晴沙知與天河接誰人欲泛槎
步步生新境千峰蒼翠深沙平開馬跡樹近別禽音安
石登山屐淵明漉酒中共歡携勝具來醉遠公林
西道有良主茲遊豈偶然最憐山水宇更故綺羅筵石
磴松為戶金樽酒似泉醉來珍簟爽一枕抱雲眠
鳥道依山峻驚峰得地雄僧伽行樹杪樓閣起霄中燈
影千方遠鍾聲萬壑空諸天應咫尺瞑坐悟圓通
涼月生南嶺清光墮石門還疑此身世別在一乾坤地
淨琉璃色松明甘露痕人天無住着兀坐已忘言

微茫三百寺占盡白雲層法供香成霧福田金作繩冷
泠千澗水熠熠萬龕燈踏徧芒屨路何方有衲僧
登臨情不極絕壁小亭開落日傍簷駐層雲盪袂來賓
家何處宅燕國舊時臺千古雙眸裏蒼茫付酒杯
琳宇龍纏棟金池虎抱泉珠迴光奕奕錫駐溜涓涓八
斛憑靈照六根洗俗緣曼陀花似雪爭墮法王前
無柰西峰日言旋馬不驕回瞻嵐氣合漸聽水聲遙後
會非朝夕前途即市朝小山如戀客相伴到溪橋

送文麓兄扶侍南還

北闕陳情日南陔色養歸晝遊明綵服晨省晃班衣舍

後魚生沼堂前雀入幃采蘭心不厭之子戀春暉

宿昌平即事

深秋將苾祀落日憇昌平霜氣高侵柳山形曲抱城關
河千古塞霜露九重情望望松梧道騶軒競月明

和李太史茂陵即事

仙寢依青嶂天行憶翠蕤珮環聲髣髴臺殿影參差皎
月迴龍馭冷風散鳳吹軒遊何日返霜露小臣悲

贈柴白石

斗室長安陌居然抱遠心星辰宿劍匣山水入琴音會
景每獨酌得句常高吟誰知市朝側能無名利侵

送張鳳原之任 二首

憐君臨四邑已是十年餘到處棠陰滿茲行麥秀初佩
刀還易犢炊甑更生魚漢殿旌循吏東方降璽書

燕市秋風始悲歌又送君心期金可斷岐路袂仍分馴
雉當年異鳴蟬此夕聞清尊寧戀別把劍看星文

送傅桑泉分數上洛

儒冠仍薄宦傳道向商顏官長經年到圖書盡日閒堂
馴銜鱸鳥宅近採芝山會有賢關召長虞應聘還

送楊中岡署校肥鄉

夫子關西裔談經三鱸堂草玄連蚤夜問字匝宮牆晴

日芸編靜薰風芹泮香垂雲還養翮九萬待南翔

送高鶴樓署校曲周

十年三獻玉猶自滯明經薄宦從鉛槧諸生見典刑講
看庭草綠吟望牖山青舊佩干將劍精光尚射星

世宗肅皇帝輓歌

五首

佳氣三河應炎圖代邸承唐侯光正統漢道燦中興忽
啓金縢禱旋驚玉几憑天行歲欲盡百辟淚成冰
四紀延昌曆三王遜令謨懔威清九服深略緯諸儒燕
翼貽豐水龍髯墮鼎湖陟方追莫逮流恨落蒼梧
金壺宵尚戒玉座曉成非雙鶴茲晨語六龍何處歸寒

光樓廣殿雲物澹靈衣誰謂鈞天夢千齡與代違
舜日期常旦堯年忽大寒那堪成王阜無復御金鑾似
厭人間世應尋帝所歡白雲凝望絕愁見塋衣冠
丹鳳辭深殿青龍啓秘宮珠襦臨大隧銀海護方中御
氣百靈迓傷心萬國同永懷殷武烈清廟頌玄工

孝恪皇太后輓歌

十首

文定推嬪則劬勞茂母慈補天功不小懷日夢仍竒椒
殿璫璜靜松陵霜露滋遺衣存賜篋聖主萬年思
玉輦初辭寵金波遽墮空影迷長信殿神駐易遷宮杳
寂苔封鏡窓閑月隱櫳年年後庭樹春至為誰紅

誕聖三宮豫遊仙一紀過徽音彤管載舊殿綠苔多雨
淚紛斑竹天心切蓼莪葉珠魂去遠無柰異香何
謳歌歸聖子貽慶本塗山天派傳方永雲輶去不還祠
宮深殿啓哀冊正朝頒薦禮園陵夜月明聽珮環
昔歲瑤京裡千家簪素花歛令銀漢上一夕渡靈車玄
鳥祠方應青禽望轉賒九重風水念哀怨寄曾沙
追慕唐情遠陪陵漢制優攢宮分永夕尊號進長秋位
極人間貴靈從地下遊景雲彰聖孝縹緲戴蒼楸
夕隊魚燈引晨途蜃輅升迎神降北渚移仗祔西靈盡
角悲風咽丹旌苦霧凝金精占王氣松栢茂相承

舜孝真無匱仁親備令猷絲綸中禁發恩澤外家周茅
土疏諸舅貂璫次列侯懸知慈訓在車馬戒如流
歲久瑤華閼春深玉兆移舊園辭廟寢新謚換容儀
九仍三獻山川即九疑冷風鸞馭杳虞殯不勝悲
桂宮悲往日柳絮引新哀十里城闌隔三泉隴道開綺
羅百子殿風雨望陵臺又見容衣掩真遊竟不迴

送太史朱金庭奉使衡藩

拔藻依鸞掖頒綸出鳳樓海邦遙帶嶽武穆近分周
設醴還清宴褰帷更壯遊采風餘大國歸獻殿東頭

題便面杏花贈春元

種向仙洲遠根從上苑移青陽先到處玄燕恰來時酥
雨穠香弄輕霞艷彩欺曲江春院裏特秀倚雲枝

陵川貞節詩

倬彼陵川節青春捐佩環貞心石可化血淚竹應班孤
鳳絃初絕神龍劍自還涑濱一丘土高並首陽山

贈耆仙周半峰還臨川

一榻長安市高談烟自如通侯爭致鱸博士慣停車黃
髮人間世青囊物外書去來心不繫特池訪匡廬

送張光祿元易奉使出塞勞六鎮貢夷

呼韓方款塞博望復乘槎馬齧長城雪車衝大漠沙旌

幢巡地脉羅綺出天家大酺羌夷樂歸鞍喧暮笳

送郭西濱之任保寧

送君西佐郡琴鶴訪江源棧閣朝馳騎巴山夜聽猿竹
驂迎道接桑蔭入春繁重見歌來暮千家有頌言

送劉約所之任元氏

明經曾拔萃十載待公車三輔分符近一行作吏初但
令刀易犢莫問金生魚會見恒山麓絃歌徧里閭

五言排律

咏月中桂

月桂何方種清宵雲外妍靈根朔後出芳樹望時全影

靜偏宜夜花開不計年高凌若木表壽擬大椿先芬都
輪中滿扶疎鏡裏懸廣寒如可問天路豈辭綿

甲子四月四日家君初廣來歲六旬矣正降兄以
詩見賀敬賡其韻

高堂今日宴獨作望雲人捧檄憐狗祿鳴珂忝從臣帝
城鄉不近親舍夢偏頻海鶴傳書遠河魚入饌珍蒼屯
松宇健丹暈柱堦新長擬春秋祝期如莊園椿

又次韻謝諸兄

忽傳瓊島什來自玉堂人錫類占能子多才信侍臣采
蘭將父切遺杜啓予頻烏哺情何極鶯求意自珍萊庭

牽目受郢調聽音新願挹同聲者長年歌大椿

送李少庄奉使肅藩二首

天綽北辰出星槎西極過文章光象緯帶礪誓山河秦
塞蕃夷接梁園雨雪多賓筵朝授簡羌管夜傳歌雲擁
臯蘭道春生積石波隴梅如可折早晚寄金坡

笳靜馬聲喧僕夫已在門送君何處別萬里訪河源驛
路風生旆關山月照軒塞春雪未盡隴曙鳥能言悵望
人千里淹留酒一尊臨岐重看劍慷慨欲銷魂

送王對南太史使蜀藩

捧節下瀛洲居然事遠遊緬編留直筆錦纜引輕舟五

月辭京洛雙星指益州懿親原魯衛上客有應劉劍閣
銘何壯琴臺賦轉優江山多勝覽歸路及清秋

送沈虹臺太史使肅藩

天綍出金閨星輶迥不迷周親百世外秦塞萬峰西叢
桂裁成賦芳桐剪作圭隴禽學客語羗馬向人嘶河帶
流沙遠山橫積雪低旌旄莫經歲芸閣待燃藜

喜葉文湖年兄見過

上苑看花侶分携六載餘忽驚霄漢節來訪薜蘿居言
念離群久歡釣傾蓋初牽裳談宿昔淪茗訊簪裾流水
軫難接浮雲態不如徃來冠蓋異生死信音疎世事暄

涼改年華歲月除凭欄聊悵望倚劍漫踟躕投分金堪
斷忘情舟自虛相過當不厭長日候高車

陪祀泰陵有感

七葉真人啓千年帝祚昌元良商太甲恭儉宋仁皇午
漏朝長樂宵衣御未央六宮薄綺縠九廟重琮璜握鏡
綜機要築金禮茂良熙文開禮樂淳化返耕桑斗正春
方始風恬海不揚五三渾比德億兆忽增傷龍化鼎湖
遠雲歸天路長山河猶歷歷歲序已茫茫甲子秋除道
祠官夜薦香九重嚴密祀百辟肅班行梧野深思舜桐
宮更憶湯寢園瞻故劍陵樹愴新霜陟降神如格低迴

意可忘白頭中使在涕淚說垂裳

送馬乾菴使蜀藩便道歸省

丹鳳銜新命碧雞訪勝遊文章光上國冠蓋動諸侯十
月頒周朔雙星烱益州畫擎龍虎節寒擁鸛鷺裘烟火
深山驛風霜野渡舟王程九折外親舍五陵幽赤幘行
相引白雲望轉道過門仍繡服獻壽更金甌冰涇魚方
美雪明笋正柔吏人迎駟馬父老導華輶山入劍門夔
江穿蟠冢流西南天萬里帶礪業千秋遺烈王楊遠懿
親魯衛優勒銘昭大訓作賦吊前修矛弩已童舞竹枝
漢女謳王孫開鴈沼才子憶龍樓宵月絲綸直春風駕

驚傳詩成隨社燕夢徃度金牛世誼叨主謝才名媿應
劉此心松栢托吾道芝蘭求驅傳君行久論文我思悠
周南非蜀道太史莫淹留

送何宵山守徽州二十二韻

堪羨新安守乘春出鳳城衣冠陳祖席琴鶴引前旌作
牧當雄郡為郎有令名灌輸玄菟靖比讞玉條平舊詔
豺狼伏新傳狴犴清芳風襲蕙若高韻叶璜珩十載含
香貴百城露冕榮懸魚防夜餉買犢易春耕閣迥延山
色庭閒遶水聲政成應渡虎候變正鳴鶯昔憶襟期密
今憐離會并龍墀隨獻賦鹿洞厠橫經壯志彈長鋏幽

懷話短檠師門席共坐客舍酒同傾歲月方流失行藏
劇轉萍鄒郊千嶺隔潘鬢二毛驚燕市還相遇驪歌忽
送行聯床何日夢沾袂此時情飛幘途將遠清尊思已
盈一官猶未調獨學竟難成結綬先違懷鉛畏後生
所期松檜質同保歲寒盟

送楊本菴使藩藩

本菴便道過家余欲來春迎家君北上托本菴
勸駕

祖帳駐旌旗光輝照別離輶軒行錫社樽俎此臨岐麟
趾分藩夔羊腸跨阪竒漢盟山若礪周道轡如絲奉使

知才美為郎有令儀和衷諳典故專對富新知國擅賢
良譽家傳忠孝資河山雄闕閱宗廟肅壘彞維梓歌恭
止皇華賦載馳宴遊招舊學烝祀啓先祠鶴堞雲連處
龍門冰泮時殷勤千里目浩蕩幾人思言念投瓊契深
慚倚玉姿從容聯世好蘊藉得餘師遊宦天同遠懷鄉
星屢移仙班迹忝竊親舍夢差池瞻望胡為爾留連併
在茲雪霏清去路柳變報歸期金石憑君信晨昏慰我
私春風催駟馬方駕詎遲遲

送楊院經鷗海之南京任

送客對西風愁看馬首東心期十載隔離別一尊同言

念揚於地遙尋定鼎宮槎津凌漢沛栢府肅周豐伯起
才名舊盈川賦思椎九衢山色裏六代水聲中搖翰時
乘興傳觴多自公君行榮晝繡吾意感秋蓬月冷闌河
白霜酣楓樹紅短亭仍戀戀前旆已匆匆人去隨江燕
音來待塞鴻相思牛首嶼芳杜發春叢

庚午立夏後二日同乾菴東岑二兄候前峰兄留
憇高明堂竟日前峰兄有倡次韻奉酬

為憶西清客言尋北郭居鳥驚懸榻處香散鼓琴餘元
凱學成癖休文帶欲舒藥爐尋宿火竹枕擁殘書雞黍
歡方洽金蘭契不踈苔堦晴意滿槐宇夏陰初看劍星

辰接談經戶牖虛淹留長日暮猶自滯旋車

和正峰兄見懷之作

夙契元傾蓋清歡幸聚簪
水天紳佩合芝社歲時深健
筆推高步微文許共尋餘光
分比屋芳譽擅詞林石質
慚攻玉蘭言期斷金應劉誰
繼響王貢舊同心談笑須
史事蹉跎四十臨青編時未
厭華髮早相侵磊落寰史
業琳瑯座右箴久欽和氏璧
忽聽伯牙琴藥鼎烹晨液
槐庭散晝陰思君興不淺為
和郢中吟

條陽先生入祠歌

河嶽標靈久乾坤毓瑞真
箕垂聞誕傳神降已生申
對

日談何健窮天思不倫道源開洙泗真派接河汾不媿
星辰夜無私草木春幽居窺大化執卷列同人律呂聲
音出直方步履陳虹垂環綠野鳳舉謁丹宸整珮遊東
序分符佐西秦懸魚羊續節馴雉魯恭仁曳杖辭端木
攀轅泣寇恂風雲歸劍履俎豆列冠紳日月勲名著春
秋享祀頻百年開盛典千古見高人鄉土思前哲門牆
媿後塵簡編尋議論風月對精神趨丈悲無地通家幸
有隣泰山瞻望切長跪薦繁蘋

留題王仰峯東山新墅

君卿不避世築勝亦墻東鹿徑天門闕虬泉地穴通樹

連千嶂碧花發四時紅函谷乘牛客孤山放鶴翁玄踪
霄漢近逸致古今同刻曲舟頻訪潯陽酒不空情親忘
信宿意愜入鴻濛萬慮形骸外百勝指顧中岫雲心與
契海鳥機相融為愛幽棲境因圖結構功一泓連帝渚
十畝並仙宮分布資圖譜裁蒔藉園僮午橋非擬議聊
試翦蒿蓬

壽介翁詩

聖主乘昌運蒼旻賚上台風雲千載會日月九天回意
氣歡魚水班行冠棘槐虞裳資繡繪商鼎賴鹽梅宣室
席頻促天章閣屢開都俞宮漏永翕闢帝圖恢麟鳳郊

園並梯航玉帛來八埏鈞雨露九塞息氛埃
曆春久逾洽孤忠老不摧黃扉五奏績錦誥
幾褒才公保崇階列孫曾奕世培恩暉超轍
冕勲業著彝罍房杜真何事夔龍許共陪
秉鈞旋衆策推轂進群林白玉雲間署黃金
天上臺標題忻草木剪拂借鴛駘恩劇六鰲
戴辭慚五鳳裁明良今宇宙萬祀願康哉

六言詩

平陸渡陝

遊子驅車越陝關河四顧茫然柳外漢唐馳道
草間虞芮閑田虎踞地雄百二鷄鳴客度三千
往事幾遷陵谷

水聲依舊潺湲

條麓堂集卷之三

七言律詩

咏路旁孤松

羨爾亭亭偃蓋姿，孤高寧是路旁枝。
不逢栢竹誰爲伴，及遇風霜世自知。
樛榦盤雲龍卧處，喬柯掛月鶴歸時。
徂徠未必能相勝，立馬高吟有所思。

贈別月峰賈丈任肅藩左史

津亭別客正春初，河外鶯花迓使車。
楚國定應陳醴酒，鄒生真見曳長裾。
日遲宮殿朱絃靜，月度關山羌笛疎。
西北藩垣今重地，知君還有治安書。

東山兄卧病經時雨中睠然懷念詩以訊之

長卿多病近何如舊雨論文今雨疎別去又經三月外
夢來常是五更初開闕好試房中術推枕還看肘後書
廿載交游君在眼時時彊飯慰離居

春日感懷

郊原春半柳垂絲變後山城碧蘚滋燕子不知當日主
桃花猶着舊年枝嶺猿躑躅梁王苑野草芊綿習氏池
眼底韶華今古恨東風翻助雍門悲

題鳳贈友人

鳳舉芳原碧霧消九苞縹緲入丹霄軒臣嶰谷初吹律

羸女瑤臺正弄簫日上高岡聲噦噦霞明弱水影迢迢
桐枝竹寔休相待二月春城有舜韶

過裴介峪山庄偶題

携壺何處訪情親裴令堂開綠水濱一日不來如隔歲
四時能醉總成春迎門雞犬疑仙屋繞舍桑麻似野人
客去北窓枕易卧清風時與泰皇隣

西署遙賀萬壽聖節即事二首

午漏沉沉香篆浮雞鳴河漢耿悠悠依稀珮玉隨鵷侶
想像雲韶出鳳樓南極曙輝明紫極西州佳氣接皇州
詞臣欲上千秋鑑北首恒山望冕旒

九天宮闕鬱燕臺聖主千年壽域開簪綬堦前執王拜
越裳海外奉琛來縈鑪霧裊當軒日祝嶽風傳統仗雷
一自西河讀戴記殷東三歲隔趨陪

送光祿正新渠魏君賜告還姚江

犀誥新恩出禁林予歸仍慰越人吟帆檣渺渺江湖道
松檟悽悽霜露心此去時鮮堪薦鱸向來靈域有馴禽
還朝莫作經年約宮漏花深憶珮音

壽王龍門乃翁用拗體

代人

仙翁騎鶴滄瀛隈行年八十聲如雷桑田變海眼曾見
槐蔭滿庭手所栽有子况為二千石無日不盡三百杯

兕觥獻壽秋仲節南極晨現光昭回

王公壽詩

白髮滄浪隱釣磯久從天竅探玄機松間孤鶴春能舞
沙際群鷗晝不飛錦軸新承伯冏誥斑斕重試老萊衣
堦除手植三槐樹見說青青已十圍

送吳近泉之任河中

謫仙佐郡出風塵為訪重華西問津衙裏看山同吏隱
水邊作賦續騷人治中詎擬淹龐統穎上由來借寇恂
今日朝廷須公等鋒車行見拜恩新

蒲城東有舜廟首陽有夷齊祠乙卯之變圯焉迄

今十稷詩以志感

每談鄉國即長吁襟帶關河亦壯區天地何心變桑海
郊原極目莽榛蕪松號斷碣殷祠歌麥秀空城舜井孤
野老歲時憐伏臘椒漿無地薦荆巫

館中小憇即事

太乙青藜有夢通萬函絃素對從容金門長日饑方朔
東觀十年滯馬融水滿御溝昨夜雨香傳別殿曉來風
寧知不是神仙骨常向蓬山憶晉中

壽北巖康隱君七十

不將踪跡混樵漁北斗城南近市居門掩紅塵朝卧穩

鼎凝白雪夜弦初延賓賸有盈樽酒教子新收滿架書
身在帝鄉三萬日更從何國覓華胥

送鄧前陵守備清浪

二首

樓船臘月下江沱威虜先聲馬伏波風靖白狼宣漢德
春回銅柱起夷歌連營地迥間猿嘯橫弩天長看鴈過
書記定能陳露布征南今日戰功多

十載懷鉛志未終却將書劍事從戎班超豈厭緗縑業
鄧訓原存帶礪功五嶺宵征開瘴道九溪春稅納蠻筒
翩翩甲馬秋無事校獵衡陽野燒紅

少源以湖廣提刑入賀暨旋便道歸省詩以送之

長安大道帶城隅
霜柳瀟瀟驄馬驅
千里歡娛經歲月
一樽離別又須臾
過家願切供魚饌
報國名高捋虎鬚
日下定承宣室召
臨岐無用重躊躇

壽倪若谷八十

仙翁小篆逼秦餘
玉案西頭舊侍書
芝檢繙來揮御墨
桃源歸去賦閑居
丹爐慣守庚申日
玄曆重逢甲子初
八十行年頭未白
蘭堦稱壽列簪裾

送王太史荊石使鄴便道歸覲

蓬山年少似君稀
衣繡乘輶出帝畿
千里採詩勤訪度
三臺開詔有光輝
鄴中詞賦推王粲
江左風流見陸機

旌蓋行行到吳會舍旁春水鯉新肥

送范太史屏麓奉使魯藩

桐葉頒恩出禁庭仙槎銀漢映雙星
勲存三望侯封舊
旆引群峰驛路青
觀樂定開垌野頌探竒還見嶧山銘
知君早授伏生學為訪宮牆科斗經

送周太史儼菴奉使荆藩

數載司綸侍玉除
壯懷仍許引輶車
茅分赤社三湘接
槎拂紅蕖五月初
夢澤乍傳新著賦
廬山重訪舊藏書
前驅負弩經行處
賸有恩暉到里閭

送張太史鳳林奉使吉藩

天綽親裁出禁扃更從南斗轉雙星
瀟湘帝子應陳醴
嶽麓諸生欲問經路入九疑山橘茂
風迴五兩渚蘭馨
江湖萬里仙槎遠知爾情懸著作庭

送王太史荊石之南雍少司成任

幾年視草直明光五月承恩出上庠
雲引舫齋圖史潤
風清江館芰荷香文章價重雙鸞掖
經學名高三鱣堂
太史周南應不滯石渠卒業待仙郎

送司馭大卿顧懷東謝政歸吳

二十年前老諫臣重來丰采動朝紳
曩時將虎推遺直
此日登龍見古人曉月正看清路輦
秋風忽漫憶江蓴

知君久有烟霞癖笠澤垂竿學富春

送陳五岳太守之淮安

朝聞仙子賦臨岐遙向淮陰把一麾共羨少年能折獄
更看暇日鮮吟詩風閑四野頌條處春到百城露冕時
長孺政成三輔最漢家璽閣豈應遲

重營三殿有述

漢主中興考建章延年溫室鬱相望雲連石陛雙龍繞
日抱丹樓五鳳翔肅事千官陪裸享子來七萃擁旂常
遙忻獻歲王正月重此車書覲八荒

壽李翁夫婦

抱璞鹿門遠卜居龐公夫婦世誰如
籊金已授趨庭業
菽筆仍傳滿地書
鳩杖相隨春讌後
兕觥稱壽晝遊初
人間甲子今重數
採藥尋山慶有餘

茂陵侯祀

松檟陰陰碧宇寒
月明壇殿立千官
忽聞仙寢開金鑰
疑傍爐烟降玉鑾
劍璽有靈秋寂寂
星河無影夜漫漫
首山鼎就軒遊遠
藏得烏號不忍看

題長陵

文皇本意清龍朔
陵墓依然控紫荆
雲繞金墉新寢廟
霜寒石壘舊屯營
銀鳧夜沒三泉影
鐵馬秋歸萬水聲

明月滿山宮漏靜斗間猶有劍光橫

送唐太史小漁使齊

曉裁恩詔出明宮旌旆逶遲入濟東十月皇華勞太史
百年青社續先公淮王原重小山賦季子今聞大國風
遙計赤帷乘興處探竒應徧日觀峰

送姚太史禹門使梁

漢殿分桐錫帝孫薊門折柳餞行軒校書暫許辭鵷侶
作賦還應過兔園大別山川雄帶礪子虛騷雅壯藩垣
遙遙四牡江南道相憶梅花春正繁

壽奉常貳卿崔秋泉初度

七十仙翁鬢未斑
早乘白鹿出人間
朝依璇宇參元典
夕護金爐煉大還
三月崆峒傳帝籙
千年姑射駐童顏
閨風亦在天紘裏
無事青牛西度關

西苑兔山之南其麓有洞焉其上石眼駢出蓋山上諸壑悉匯其頂雨集則百道並流名曰水晶簾云洞中屈曲一龍中官為余道雨時勝槩因想像賦之

巖洞陰陰負碧巒
洞門群壑瀉潺湲
雷驚銀漢千崖落
雪洒瑤池六月寒
此日林塘看鷺浴
白來風雨憶龍蟠
乘槎近與仙源接
極目蓬瀛興未闌

贈近山潘翁八十

綸巾芒屨世情疎，抱犢山中自結廬。
簷外栽松深引鶴，溪邊枕石靜觀魚。
晴原鳩杖登臨處，春酒兕觥拜舞初。
百歲壽康應未艾，漸看蘭桂接簪裾。

送阜南陸諫議使鄴

鄴都宮殿枕漳河，夕拜仙郎擁傳過。
周室宗盟頒玉節，魏時風物訪銅駝。
路經淇澳還瞻竹，舟到江鄉正採荷。
會取方謠歸諫草，向來丹地直聲多。

十六夜同張民部韓繕部宴月時韓有兩淮之命
秋光強半一傳卮，今夜冰輪減昔規。
莫向世途輕聚散，

分明天道亦盈虧芙蓉臺榭留歌舞芳杜汀洲怨別離
來歲陰晴那可問且拚歡賞共心知

贈郭三川出守寶慶

洞庭南下楚天虛十月江城轉使車俗化耕桑渤海犢
梁懸暮夜武昌魚湘筠雨後堪成賦峰鴈春前可寄書
循吏此行應第一璽徵不日慰離居

送劉懋一太史奉使靖江便道歸省

粵徼何人引使旌蓬山年少舊知名桂林葱蒨槎遠
修竹檀欒賓館清緬檢思懸雙鳳闕錦衣歸向五羊城
萊庭春酒稱觴處擬聽桺榔樹底鶯

謁禹廟

兩山中斷豁鴻濛迴合丹崖奠禹宮
疏鑿宛然千嶂蹟平成遠矣萬年功
龍蛇畫壁流元氣散冕遺容見古風
今日河防關國計小臣瞻拜瀝深衷

登看鶴亭

半山突兀出危岑下有洪濤萬丈深
水面樓臺疑蜃氣空中簫管學龍吟
薜蘿緣磴雲生足松檜懸崖風滿襟
指點仙源西北近試拋竹杖棹舟尋

汾陰祠懷古

睢原廟宇枕汾涯想像前朝駐翠華
不見龍旂屯檜栢

尚餘龜碣卧塵沙野人采藻祠春燕漁子鳴榔起暮鴉
今古山河千里目高樓吟望對明霞

春興八首

澹蕩條風散小桃即看淑氣轉東臯烟消鵲堞分晴嶂
氷鮮龍門瀉夜濤青眼故人頻送醴碧山學士欲焚膏
垂輝禮樂千春事白首懷鉛不憚勞

回谿深處少人家構竹編茅傍水涯白鶴特來尋舊主
碧桃著意發新葩未論庭宇開三逕且借軒窓閱五車
珍重故交清夜訪試將茶竈煮松花

嵯峨雷首瞰重關天關中經第一山洞敞丹霞留鳥跡

峰回玉女竦螺鬟道人抱犢尋芝遠童子乘鸞捧藥還
記得廣成真訣在擬脩石室駐朱顏

曉禁鶯啼萬戶春羽林十二護鈎陳千門風細傳清樂
三殿雲深擁近臣沙磧名王修歲貢江淮飛艦薦時新
無端采藥來玄圃一倍看花憶紫宸

集賢殿閣帶昆池二月宮牆變柳絲綺鳳穿雲縹帙麗
金鳬浴日篆烟遲芽籤指點回天矚黼座流連注睿思
此日西河天萬里小窓幽鳥囀花枝

水遶亭臺樹遶門春光先到辟疆園鷗忻沙煖晴相趁
鶯覺林暄曉故言探勝不須著短屐問奇時復過高軒

誰知漢掖當皆藥也向蕭齋依砌翻

無論荷芰與簪裾春服時成興自如金馬幾年深視草
蒼龍一曲靜藏書瑤壇芝秀隣仙室畫棟芸清接帝居
千載河汾還鼓瑟欣欣嘉樹愛吾廬

歲華忽漫二毛侵猶抱區區囊甘心元凱自名為傳癖
孝標人擬是書淫吹藜永夜勤繡蠹散枕晴窓靜聽琴
滿眼玄黃那可道緗縑千古有知音

謁舜廟

重華遺廟古城隈城上薰風百尺臺谷近二陵留異竹
泉分雙井滋新苔深山木石鹿仍過廣殿簫韶鳳自来

千載垂衣逢舜旦卿雲常是護三台

甲戌應召抵都宿城南志感二首

憶別金華供奉行漁樵踪跡混滄浪雲岑携杖春能健
月浦搖舲夜未央清樂遠牽閭闔夢賜衣深襲御爐香
景陽宮漏千門側此夕重聞鬢有霜

奉命重来侍禁廬清宵齋室理簪裾漫勞鳳詔搜盤谷
豈有螢光補望舒三北受知慙管鮑二南嗣響媿劉徐
腐儒報國終何賴點檢青燈一卷書

內閣觀芍藥

鸞掖韶光何處尋滿庭紅藥爛成林風飄玉鼎香同馥

日映彤樓色共深
穠淡漸看春夏改
芳華寧受雪霜侵
坐來還憶南薰殿
茂對應絃鮮愠琴

悼馬

惜爾權奇力未衰
十年京國鎮相隨
絆韉苦恨淹逸足
填壑仍憐闕敝帷
金谷嘶風春譙後
玉溝踏月早朝時
眼前岐路今猶昨
每到經行有所思

五七言絕句

山居春雪五首

飛雪點窓紗
銅爐夜煮茶
幽香何處是
牆外有梅花
風雪迅相催
輕寒入榻來
袁安朝卧穩
荆戶不曾開

鐵硯冰花碎，羗衾燈影孤。坐深天地寂，寒鳥一相呼。
綠樹深宮裏，黃雲瀚海頭。平陽春賜錦，驃騎夜眠裘。
華嶽雲中色，黃河水裏聲。夕陽天地豁，兀坐小齋清。

擬古宮詞 五首

不將竹葉引羊車，獨倚鸞簫弄綵霞。十載玉顏春殿閉，
外頭聞道選良家。

妾貌分明與衆殊，曉窓握鏡自躊躇。也知粉繪能相悞，
羞把千金買畫圖。

一自承恩入禁庭，靚粧常日伴雲屏。鸞輿何處重門掩，
輦路春來草又青。

當年被選謁明光
珠綴垂髻過御廊
遙望赭黃深殿裏
內家爭說是君王

星壇何處鼓鑿鑿
似隔天門更九重
知是君王三醮畢
沉檀高焰炙窓紅

七夕有感

牛渚陰陰天路迢
滿城兒女鬧深宵
一年佳節還風雨
不見仙輶度鵲橋

塞上曲

紀癸亥秋宣大事

狼烽一夜徧居庸
漢將全收不戰功
應念君王勤北顧
捷書飛奏未央宮

三秋亭堠迥無烟一夕雞鳴名鎮血滿川風雨憑陵胡騎
遠居庸北望草連天

老上憑秋西射鴈控弦百萬過臨洮左賢分取三千騎
十日燕山殺氣高

胡馬秋肥塞草長彎弧直擬犯漁陽歸途却避弓闌水
知是嫖姚舊戰場

鐵騎連營扼塞扉五更刀斗靜戎機薦聞營外烏啼月
共道單于夜遁歸

暮春吟二首

郊原晴日冒遊絲萬點殘紅蝶困時怪底楊花作意舞

東君回首是歸期

花落平原長綠蕪
融和天氣即皇虞
杏壇鼓瑟今誰在
童冠當年詠舞雩

送陳心鑑歸豐城二首

為問先天數有無
風聲鳥語露真符
羨君獨向深淵底
探得驪龍領下珠

舊與群仙靜結盟
江湖萬里御風行
只因傳得三元訣
却使人間知姓名

送馮星命還楚二首

青白無勞涉世緣
有時抵掌即談天
一尊燕市相逢日

回首東風二十年

斗室長安自卜居五侯門逕夜停車無端却鼓瀟湘櫂
春草深心戀倚閭

贈前鮮梁守李君思毅詩

有引

李君守鮮以循吏稱宜民為一道最甲戌入覲
民計日佇其歸也忽聞君鮮組去則相與咨嗟
歎望愈久而不忘予時里居擬為一言紀其善
未果也比入都偶為塾賓劉孝廉言之劉鮮人
遂具軸請題為賦二絕

馴雉翻飛麥壠分雙岐麥秀憂如雲當時露冕經行處

歲歲春深望使君

方驅五馬謁明光
忽卧燕南舊草堂
父老歲時北向拜
每從德政說甘棠

應制題四景畫

四首

縹緲桃花照上林
綠波碧草映新禽
韶華滿眼春圖裏
仰見君王茂育心

的礫榴房百子盈
繞枝細萼更分明
清泉奇石渾忘暑
擬奏薰絃暢睿情

霜淨郊原見竹枝
香浮叢菊艷東籬
馴禽啄黍築場後
知是吾皇省歛時

花滿南枝雪未勻
暗香疎影出風塵
直從朔候窺天意
鳥舞泉流先報春

應制題畫

二首

闔闔風回物候新
早芳雜遘闔精神
誰知咫尺方壺境
收盡園林萬象春

露沁芳林暑未收
競將繁艷占清秋
恍疑玄圃群仙宴
羅綺繽紛十二樓

耳聾自嘲口號

五首

六十何緣耳便聾
應嫌聲入與心通
道人授我長生訣
却聽原來第一功

竹屋山房集 卷之三
誼譚真非野性堪世途雙耳飽曾諳從今不用臨流洗
棹潤螢輝任夢譚

當年進履圮橋公提耳傳書戒用聰策蹇昨由橋上過
無端野老戲龍鍾

塞兌辭紛老境宜五湖深處學鷗夷安眠但覺扁舟穩
風浪掀天總不知

雅鄭無心別派流潛神虛室是真修耳根清淨渾如許
穴蟻由他晝鬪牛